



Broj: 01-50-1-15-37/04.
Sarajevo, 9. juna 2004.

ZAPISNIK

37. sjednice Predstavničkog doma Parlamentarne skupštine Bosne i Hercegovine

Tridesetsedma sjednica održana je u tri dijela.

Prvi dio sjednice održan je 21. maja 2004. godine, s početkom u 10,15 sati. Prisustvovalo je 37 poslanika. Odsustvo su opravdali: Elmir Jahić, Filip Andrić, Milorad Živković, Abdulah Nakaš i Nijaz Duraković.

Iz Vijeća ministara sjednici su prisustvovali predsjedavajući Adnan Terzić i ministar Dragan Doko.

Sjednici su prisustvovali Damir Leko – potpredsjednik Udruženja proizvođača i prerađivača mesa; Zlatan Ivanović – Udruženje peradara BiH, Vladimir Usorac – Udruženje poljoprivrednih proizvođača RS i Smail Hadžalić – Cazin.

Iz međunarodnih organizacija sjednicu su pratili Sven Marius Urke, Maja Ribar i Edita Pašalić – OHR, Jelena Despot – EUPM i Mirsad Žiga – američka ambasada.

U raspravi o prijedlogu dnevnog reda Hazim Felić predložio je da se u dnevni red uvrsti Izvještaj Zajedničke komisije o usaglašavanju identičnog teksta Zakona o policijskim službenicima, s obzirom da je Zajednička komisija upravo završila posao na usaglašavanju.

Dom je usvojio prijedlog Hazima Felića, pa je predsjedavajući konstatirao da 37. sjednica ima sljedeći

DNEVNI RED

1. Zahtjev Vijeća ministara za razmatranje Prijedloga zakona o dopunama Zakona o carinskoj tarifi Bosne i Hercegovine po hitnom postupku, u skladu s članom 105. Poslovnika,
2. Zahtjev poslanika Nikole Špirića za razmatranje Prijedloga zakona o dopuni Zakona o Visokom sudskom i tužilačkom vijeću po hitnom postupku, u skladu s članom 105. Poslovnika,
3. Zahtjev poslanika Nikole Špirića za razmatranje Prijedloga zakona o dopuni Zakona o državljanstvu Bosne i Hercegovine po hitnom postupku, u skladu s članom 104. Poslovnika,
4. Zahtjev Vijeća ministara za razmatranje Prijedloga zakona o flaširanim pitkim vodama Bosne i Hercegovine po hitnom postupku, u skladu s članom 104. Poslovnika,
5. Prijedlog zakona o postupku medijacije (drugo čitanje),
6. Imenovanje člana Komisije za vanjsku trgovinu i carine (umjesto Hasana Muratovića),
7. Davanje saglasnosti za ratifikaciju:
 - a) Sporazuma između Vijeća ministara Bosne i Hercegovine i Vlade Sjedinjenih Američkih Država o zaštiti i očuvanju određene kulturne svojine,
 - b) Sporazuma između Bosne i Hercegovine i Vlade Republike Francuske o recipročnom unapređenju i zaštiti investicija,
 - c) Sporazuma između Vijeća ministara Bosne i Hercegovine i Vlade Republike Albanije o ukidanju viza za nosioce diplomatskih i službenih pasoša,

- d) Ugovora o slobodnoj trgovini između Bosne i Hercegovine i Rumunije,
 - e) Konvencije o zaštiti lica s obzirom na automatsku obradu ličnih podataka i Izmjene i dopune Konvencije o zaštiti pojedinaca s obzirom na automatsku obradu ličnih podataka,
 - f) Dodatnog protokola uz Konvenciju za zaštitu pojedinaca s obzirom na automatsku obradu ličnih podataka u vezi s nadzornim organima i prekograničnim protokom podataka,
 - g) Amandmana broj 2. Kreditnom sporazumu između Evropske banke za rekonstrukciju i razvoj Bosne i Hercegovine,
8. Izvještaj Zajedničke komisije o usaglašavanju identičnog teksta Zakona o policijskim službenicima.

Ad – 1: Zahtjev Vijeća ministara za razmatranje Prijedloga zakona o dopunama Zakona o carinskoj tarifi BiH po hitnom postupku, u skladu s članom 105. Poslovnika

Ministar vanjske trgovine i ekonomskih odnosa Dragan Doko podnio je Domu obrazloženje zahtjeva za hitni postupak i Prijedloga zakona o dopuni Zakona o carinskoj tarifi.

Predsjedavajući Vijeća ministara također je govorio o važnosti donošenja izmjena Zakona o carinskoj tarifi, kao i o tome šta je Vijeće ministara učinilo povodom primjedbi koje su poslanici na Prijedlog zakona iznijeli na prethodnoj sjednici.

Poslije izlaganja predsjedavajućeg Vijeća ministara, Zlatko Lagumdžija postavio je pitanje ko sve prisustvuje sjednici Doma i po kom kriteriju su pozivani, te šta je od materijala podijeljeno poslanicima, izrazivši sumnju da su pojedini materijali dijeljeni selektivno.

Predsjedavajući Doma Martin Raguž odgovorio je da su na sjednicu pozvani oni koji se redovno pozivaju na sjednice, a da su, na prijedlog predsjedavajućeg Vijeća ministara, koji je iznio na Proširenom kolegiju, sjednici prisutni članovi Radne grupe koja je učestvovala u izradi Prijedloga zakona. Što se tiče materijala, predsjedavajući Raguž rekao je da su svi poslanici dobili iste materijale i da ništa selektivno nije dijeljeno.

U raspravi u okviru tačke dnevnog reda učestvovali su : Beriz Belkić, Selim Bešliagić, Sead Avdić, Tihomir Gligorić, Seada Palavrić, Momčilo Novaković, Vinko Zorić, Petar Kunić, Azra Hadžiahmetović, Muhamed Moranjkić, Jozo Križanović, Nikola Špirić, Nikola Kragulj i predsjedavajući Vijeća ministara Adnan Terzić

Jedan broj poslanika u raspravi je iznio niz primjedbi na Prijedlog zakona, kao i na zahtjev za hitni postupak, te zatražili da predsjedavajući promijeni zahtjev sa člana 105. na član 104. Poslovnika.

Nakon rasprave, predsjedavajući Doma dao je pauzu na zahtjev Kluba SDS-a.

Nakon pauze, predsjedavajući Vijeća ministara Adnan Terzić uzeo je riječ, te je, povodom zahtjeva jednog broja poslanika da se promijeni zahtjev za proceduru, između ostalog, rekao da se radi o tome da bi dopuna Zakona o carinskoj tarifi pojedine grupacije proizvođača dovela u poziciju da bi im ove mjere za mjesec dana bile bespotrebne što bi ih dovelo u nepovoljan položaj. Zato je zamolio da se još jednom razmisli i da se prihvati procedura po članu 105. Ukoliko se insistira da se procedura promijeni na član 104., zatražio je pauzu kako bi se konsultirao s članovima Vijeća ministara.

Predsjedavajući Doma Martin Raguž zamolio je da Vijeće ministara pred Dom izađe s definitivnim stavom oko procedure, pa je u tu svrhu dao pauzu.

Nakon pauze, predsjedavajući Vijeća ministara obavijestio je Dom da nije u mogućnosti danas mijenjati zahtjev za proceduru jer se radi o odluci Vijeća ministara. Naglasio je da je Vijeće ministara tražilo vanrednu sjednicu oba doma samo s ovom tačkom dnevnog reda jer je situacija ozbiljna, pa je predložio da se sazove vanredna sjednica za sljedeću sedmicu, a da se s ove sjednice ova tačka skine.

Predsjedavajući Doma Martin Raguž odgovorio je da je ova sjednica sazvana po hitnom postupku upravo zbog zahtjeva Vijeća ministara, a da su druge tačke uvrštene iz praktičnih razloga. Zatim je, u ime Kolegija, predložio da se ova sjednica prekine i nastavak sazove za 28. maj, a da do tada Vijeće ministara održi sjednicu i na Dom dođe sa jasnim stavom, o čemu će se nastaviti rasprava.

Za riječ se javio Zlatko Lagumdžija i zatražio da Dom zaključkom jasno kaže šta do sjednice Doma Vijeće ministara treba uraditi, da ispuni ciljeve koji su se danas u raspravi čuli, jer bez toga odgađanje nema svrhe, rekao je Lagumdžija, pa je predložio i tekst zaključaka.

Predsjedavajući Martin Raguž rekao je da Vijeće ministara ima dovoljno vremena i da će sagledati sve aspekte problema, pa je konstatirao da, u skladu s članom 25. Poslovnika, prekida 37. sjednicu i nastavak saziva za 28. maj 2004. u 10,00 sati.

Ovim je, u 12,45 sati, završen prvi dio sjednice.

Drugi dio 27. sjednice održan je 28. maja 2004. godine, s početkom u 10,20 sati. Prisustvovalo je 37 poslanika. Opravdano su odsustvovali: Elmir Jahić, Ivo Miro Jović, Nijaz Duraković, Momčilo Novaković i Zlatko Lagumdžija.

Iz Vijeća ministara nastavku sjednice povremeno su prisustvovali Adnan Terzić, Dragan Doko, Mirsad Kebo i Momir Tošić. Također su prisustvovali članovi Radne grupe: Smail Hadžialić, Vladimir Usorac, Zlatan Ivanović i Damir Leko.

Iz međunarodnih organizacija sjednicu su pratili Amra Imamović – OHR, Kristijan Haupt i Željko Grubešić – OSCE, Vesna Vignjević – UNHCR i Jelena Despot – EUPM.

Na početku nastavka sjednice ministar vanjske trgovine i ekonomskih odnosa Dragan Doko govorio je u ime Vijeća ministara. Rekao je da su imali nekoliko sastanaka koje su organizirali u cilju pojašnjenja svih predloženih mjera vezano za rezerve koje su isticane u raspravi na sjednici Doma i koje su date od poslanika. Prijedlog ovih dopuna nema za posljedicu izmjene stopa u Zakonu o carinskoj tarifi, već da ima novo poglavlje zakona koje se zove «Tarifne kvote» koje daju pravni osnov Vijeću ministara da intervenira u onim situacijama kada određenih kategorija mesa nema dovoljno na našem tržištu, pa da se može nabaviti iz inozemstva, rekao je, između ostalog, ministar Dragan Doko. Dalje je naglasio da ne može reći u kojoj su mjeri uspjeli u otklanjanju svih nedoumica, ali da su uvijek isticali garanciju da su kao Vijeće ministara spremni provesti sve mjere na najkvalitetniji mogući način, pazeći pri tome na sve moguće malverzacije. Izrazio je nadu da će Parlament imati povjerenja u Vijeće ministara i izglasati dopune Zakona o carinskoj tarifi.

Beriz Belkić zatražio je da se resorni ministar očituje povodom pisma koje su poslanici dobili od zamjenika visokog predstavnika, kao i drugih pisama koja su stigla povodom predloženog zakona.

Ministar Doko odgovorio je na pitanja Beriza Belkića.

Drugi zamjenik predsjedavajućeg Doma Nikola Špirić rekao je da je očekivao da će Vijeće ministara danas izaći s prijedlogom koji će značiti rješenje problema, na fonu prijedloga koji su izneseni u raspravi na prvom dijelu sjednice. Gotovo je sigurno da ovakvo insistiranje Vijeća ministara samo može pojačati sumnje koje su izrekli poslanici, rekao je, pored ostalog, Nikola Špirić, te napomenuo da je i od Parlamenta Federacije stiglo pismo kojim traže da se ne prihvati procedura po članu 105., a da ni Ministarstvo poljoprivrede RS-a nije dalo saglasnost, te da resorno ministarstvo Federacije BiH nije učestvovalo u kreiranju predloženog zakona.

Predsjedavajući Doma Martin Raguž konstatirao je da je rasprava o zahtjevu za hitni postupak završena na prvom dijelu sjednice, pa je zahtjev dao na glasanje.

Za zahtjev glasala su 24 poslanika, 12 je glasalo protiv, jedan je bio uzdržan. Po entitetima, iz Federacije BiH za su glasala 23, a iz Republike Srpske jedan poslanik.

Kako nije bilo entitetske većine, izvršeno je usaglašavanje u Komisiji Kolegija, nakon čega je predsjedavajući upoznao Dom o tome da je u Kolegiju postignuta saglasnost, čime je usvojen zahtjev Vijeća ministara da se Prijedlog zakona o dopuni Zakona o carinskoj tarifi razmatra po hitnom postupku u skladu s članom 105. Poslovnika. Zatim je otvorio raspravu o Prijedlogu zakona.

Povodom Prijedloga zakona o dopunama Zakona o carinskoj tarifi vođena je duža i polemična rasprava, u kojoj su učestvovali: Nikola Špirić, Tihomir Gligorić, Mladen Potočnik, Petar Kunić, Azra Hadžiahmetović, Sead Avdić, Seada Palavrić, Jozo Križanović, Muhamed Moranjić, Miloš Jovanović, Šefik Džaferović, Izet Hadžić, Fatima Leho i Beriz Belkić. Tokom rasprave govorili su i predsjedavajući Vijeća ministara, ministar Dragan Doko i njegov zamjenik Momir Tošić. Također su govorili i članovi Radne grupe Vladimir Usorac i Damir Leko.

Nakon rasprave, predsjedavajući je Prijedlog zakona dao na glasanje. Međutim, u ime Kluba SDS, Miloš Jovanović zatražio je pauzu kako bi se konsultirao s predsjednikom Vlade RS-a u vezi s prijedlogom zaključka koji je iznio predsjedavajući Vijeća ministara – da Dom usvoji Prijedlog zakona, a da zaključkom obaveže Vijeće ministara da u prvoj fazi Zakon primijeni samo do 1/3 predviđenih kvota, a onda da sačini analizu šta su te mjere doprinijele, da o tome obavijesti Parlament i da, eventualno, dobiju saglasnost da idu dalje.

Predsjedavajući Martin Raguž naglasio je da su poslanici dobili sve elemente i da je predsjedavajući Vijeća ministara ovdje potvrdio da ima saglasnost resornih ministara u entitetskim vladama, te da on ne može preuzeti odgovornost da se ova tačka ne završi.

Miloš Jovanović insistirao je na pauzi, rekavši da sudbina zakona zavisi od glasova poslanika SDS-a i da bi oni za Prijedlog zakona glasali ukoliko bi od predsjednika Vlade RS-a dobili pismenu saglasnost da se predviđene kvote primijene do 1/3.

Predsjedavajući Raguž rekao je kako smatra da nema potrebe za pauzom, pa je na glasanje dao Prijedlog zakona s prijedlogom zaključka koji je dao predsjedavajući Vijeća ministara.

Od prisutnih 37 za je glasalo 19, protiv 15, uzdržala su se 3 poslanika. Po entitetima, iz Federacije BiH za je glasalo 18, iz RS jedan poslanik. Zbog nedostatka entitetske većine proveden je postupak usaglašavanja u Kolegiju kao Komisiji.

Predsjedavajući je upoznao Dom da u Komisiji Kolegija nema saglasnosti, pa je proveo drugi krug glasanja, kada su iz Federacije BiH protiv glasala 4 poslanika, a iz Republike Srpske 11.

Predsjedavajući je konstatirao da Predstavnički dom nije usvojio Prijedlog zakona o dopunama Zakona o carinskoj tarifi BiH.

Predsjedavajući Raguž dalje je na glasanje dao prijedlog zaključka koji je u diskusiji iznio Nikola Špirić.

Za zaključak glasalo je 14 poslanika, 4 protiv i 6 uzdržanih – iz Federacije za je bilo 10, iz RS 4. Zbog nedostatka entitetske većine proveden je postupak usaglašavanja, nakon čega je predsjedavajući obavijestio poslanike da je u Kolegiju postignuta saglasnost. Prema tome, usvojen je sljedeći

ZAKLJUČAK

S ciljem obnove i podizanja domaće proizvodnje, Predstavnički dom Parlamentarne skupštine Bosne i Hercegovine zadužuje Ministarstvo vanjske trgovine i ekonomskih odnosa da, u roku od 60 dana, zabrani izvoz sirovina iz Bosne i Hercegovine do nivoa do kojeg postoji potreba domaćih prerađivačkih kapaciteta u Bosni i Hercegovini.

Zbog dužine trajanja sjednice i plenarne sjednice koja se u 16,15 sati održava zbog obraćanja Parlamentu generalnog sekretara NATO-a, u ime Kolegija, predsjedavajući je predložio da se završe 7. i 8. tačka, a da se onda sjednica prekine.

Prijedlog je prihvaćen.

Ad – 7: Davanje saglasnosti za ratifikaciju:

- a) Sporazuma između Vijeća ministara Bosne i Hercegovine i Vlade Sjedinjenih Američkih Država o zaštiti i očuvanju određene kulturne svojine,
- b) Sporazuma između Bosne i Hercegovine i Vlade Republike Francuske o recipročnom unapređenju i zaštiti investicija,
- c) Sporazuma između Vijeća ministara Bosne i Hercegovine i Vlade Republike Albanije o ukidanju viza za nosioce diplomatskih i službenih pasoša,

- d) Ugovora o slobodnoj trgovini između Bosne i Hercegovine i Rumunije,
- e) Konvencije o zaštiti lica s obzirom na automatsku obradu ličnih podataka i Izmjene i dopune Konvencije o zaštiti pojedinaca s obzirom na automatsku obradu ličnih podataka,
- f) Dodatnog protokola uz Konvenciju za zaštitu pojedinaca s obzirom na automatsku obradu ličnih podataka u vezi s nadzornim organima i prekograničnim protokom podataka,
- g) Amandmana broj 2. Kreditnom sporazumu između Evropske banke za rekonstrukciju i razvoj i Bosne i Hercegovine,

U okviru ove tačke nije bilo rasprave.

Dom je jednoglasno dao saglasnost za ratifikaciju akata iz ove tačke.

Ad – 8: Izvještaj Zajedničke komisije o usaglašavanju identičnog teksta Zakona o policijskim službenicima.

Dom je jednoglasno usvojio Izvještaj Zajedničke komisije o usaglašavanju identičnog teksta Zakona o policijskim službenicima.

Ovim je, u 15,30 sati, završen drugi dio 37. sjednice.

Treći dio 37. sjednice održan je **9. juna 2004.** godine, s početkom u 10,05 sati. Prisustvovalo je 39 poslanika. Odsustvo su opravdali Mehmed Suljkanović, Ibrahim Đedović i Mirko Blagojević.

Iz Vijeća ministara sjednici je prisustvovao ministar Dragan Doko, a iz međunarodnih organizacija Maja Ribar – OHR.

Sjednica je rad nastavila na realizaciji 2., 3., 4., 5. i 6. tačke usvojenog dnevnog reda.

Ad – 2: Zahtjev poslanika Nikole Špirića za razmatranje Prijedloga zakona o dopuni Zakona o Visokom sudskom i tužilačkom vijeću po hitnom postupku, u skladu s članom 105. Poslovnika

Nikola Špirić obrazložio je zahtjev za hitni postupak, kao i potrebu donošenja ovog zakona.

U raspravi u okviru ove tačke učestvovali su: Seada Palavrić, Munib Jusufović, Nikola Špirić, Miloš Jovanović i Mirsad Ćeman.

Nakon rasprave, predsjedavajući je na glasanje dao zahtjev predlagača za hitni postupak.

Za je glasalo 8, protiv 19, uzdržala su se 4 poslanika.

Predsjedavajući je konstatirao da zahtjev za hitni postupak nije usvojen i da će se Prijedlog zakona o dopuni Zakona o Visokom sudskom i tužilačkom vijeću razmatrati u redovnoj proceduri.

Ad – 3: Zahtjev poslanika Nikole Špirića za razmatranje Prijedloga zakona o dopuni Zakona o državljanstvu BiH po hitnom postupku, u skladu s članom 104. Poslovnika

U okviru ove tačke nije bilo rasprave.

Sa 18 glasova za, 14 protiv i jednim uzdržanim (iz Federacije za je glasalo 10, iz Republike Srpske 8), usvojen je zahtjev Nikole Špirića za razmatranje Prijedloga zakona o dopuni Zakona o državljanstvu BiH po članu 104. Poslovnika Doma.

Ad – 4: Zahtjev Vijeća ministra za razmatranje Prijedloga zakona o flaširanim pitkim vodama BiH po hitnom postupku, u skladu s članom 104. Poslovnika

Ministar vanjske trgovine i ekonomskih odnosa Dragan Doko obrazložio je zahtjev Vijeća ministara za hitni postupak. Diskutirali su Mirsad Ćeman i Selim Bešliagić.

Nakon diskusije, Dom je jednoglasno usvojio zahtjev Vijeća ministara za razmatranje Prijedloga zakona o flaširanim pitkim vodama BiH po članu 104. Poslovnika.

Ad – 5: Prijedlog zakona o postupku medijacije (drugo čitanje)

Predsjedavajući Doma konstatirao je da je poslanik Selim Bešliagić podnio amandmane na Prijedlog zakona pozivom na član 94.tačka 3.a.

U raspravi povodom amandmana učestvovali su: Momčilo Novaković, Selim Bešliagić, Vinko Zorić, Petar Kunić, Beriz Belkić i Tihomir Gligorić.

Nakon rasprave, predsjedavajući je konstatirao da je Selim Bešliagić povukao 2. i 3. amandman, pa je na glasanje dao amandman br. 1.

Za amandan je glasalo 17, protiv 18 poslanika.

Predsjedavajući je konstatirao da amandman 1. nije usvojen.

Još su kratko diskutirali Selim Bešliagić i Vinko Zorić, a onda je predsjedavajući na glasanje dao Prijedlog zakona.

Sa 31 glasom za, 3 protiv i jednim uzdržanim Dom je usvojio Zakon o postupku medijacije.

Ad – 6: Imenovanje člana Komisije za vanjsku trgovinu i carine
(umjesto Hasana Muratovića)

Predsjedavajući je obavijestio poslanike da je Klub SDA predložio da se u Komisiju za vanjsku trgovinu i carine imenuje Izet Hadžić.

Dom je jednoglasno imenovao Izeta Hadžića za člana Komisije za vanjsku trgovinu i carine.

Ovim je, u 11,00 sati, završena 37. sjednica Predstavničkog doma.
Sastavni dio Zapisnika je transkript 37. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVALAČI
PREDSTAVNIČKOG DOMA
Martin Raguz